



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK

Yangia anidakangma :

f Tir Yimyim

ig tiryimyim@aolima

yt tiryimyim

TAPAK 8



China Tir Xi Jinping-i BRICS
tuluba akumtsü ayongzük



NZ coaching team nung
Stephen Fleming denogo

VOL. XX NO. 312 (ADOK 312) DIMAPUR YANGTEPNÜ (THURSDAY)

LUROI (AUGUST) 24, 2023

₹ 5.00

Tanü nungi Ukhrul nung NSF mungdang tenzüker

Ukhrul, August 23, 2023 (Agencies): Manipur kübok Ukhrul district nung August 24 nungi 26, 2023 tashi Naga Students Federation (NSF) lokti mungdang amongtsü.

‘Solidarity beyond Borders’ omen nung ajemdaker amongba mungdang nung Assam, Arunachal Pradesh, Nagaland, Manipur aser Myanmar nungi Naga kaketshir 1,200 shi adentsü.

Iba mungdang ya Tangkhul Katamno Saklong (TKS)-i achayanga Ukhrul jila nung amongtsü. Küm 30 sülen Tangkhul nung lima nung NSF mungdang amonger.

Mungdang lapokba sentong nung Nagaland MLA aser taoba NSF Tir Achumbemo Kikon aser Nagaland School Education and SCERT Advisor Dr Kekhrielhoulie Yhome nati alakteta jaokertem ama shilem agitsü

Maneni, Manipur Outer MP Dr Lorho S Pfoze-ia mungdang shibangba sentong nung adentsü.

Mungdang atemba sülen kümsük 2023-2025 atema NSF general election agitsü.

Mungdang tiptema amongtsü atema nisung ajaki National Highway memokdangtsü ayongzük ta mungdang ayongertemi metetdaksüogo.

Sorkari yimten telatetba ka agitsü: CM Biren Singh

Imphal, August 23, 2023 (Agencies): Centre aser Manipur sorkartemi raratep aser ozüing alema inyaksangshiba anendaksütsü atema yimten telatetba ka agitsü meranger ta Manipur chief minister N Biren Singh-ia shi.

Manipur nung telok balala tsüingda olemtep aiben menaka tangatetep kati marutetba mapang ka nung CM Biren-ia iba osang metetdaksü.

Pai Prime Minister Narendra Modi aser union home minister Amit Shah dena Centre sorkar den maneni osang metetpelaa arudar ta pai ashi.

Manipur nung yimjung aser tensa süngjemtsü atema yimten telatetba ka yakta agitsü ta CM Biren-ia shi.

Manipur sorkari akokba tashi state nung yimjung aser tensa süngjemtsü atema inyaka arur. Sorkar mapang shitak nung anema noktakerem samatsütsü, ta pai ashi.

Kin o kin tsüingda rara ajanga pei talidak toktsür jena aoertem yaritsüba sorkar indang mapa tongtipangtiba lir ta Biren-ia shi.

Bodbarnü Manipur chief minister-ia pei talidak toktsür aoertem nem Imphal East district nung aliba Sajiwa jail complex nung temporary shelter agütsü.

District balala nung nisung 400 anenzüketba temporary

shelter homes 6 tashi yangluogo, ta CM Biren-ia metetdaksü.

“Manipur sorkari tesem 8 nung pre-fabricated houses yangludat. Bishnupur district kübok Kwakta nung ki 320, Sajiwa nung 400, Imphal East kübok Sawombung nung 200 aser Thoubal district kübok Yaithibi Loukol nung ki 400 yangludat” ta paisa metetdaksü. m

“Taruba anogo 10-15 tsüingda lendenlen ki belentsü. Onokisa tesem aika nung permanent structures yanglutsü survey tenzüko” ta paisa ashi.

“Kangpokpi aser Churachandpur district tem nung tera menutsü. Kangpokpi district nung kibong 700 atema tesem ana repranga lir. Churachandpur nunga tesem ka shimogo” ta CM Biren-ia shi.

“Prangpong amshia amakba anenogo. Tensa süngjemogo ta onoki bilemer. Nisung ajaki yaritepba ajanga tensa azüoktetogo” ta Manipur CM-ia shi.

Manipur nung Meitei nungeri Scheduled Tribe (ST) meshiba anema taküm May ita hill district tem nung Tribal Solidarity March ka alidang kin o kin mepetmesü adoka raratep.

Iba anogo nungi tenzüker tatalokba balala nung nisung 160 tema süogo aser aika yiru.

Kohima nung ASF osang metetdaksür

Dimapur, August 23, 2023 (TYO): Kohima District kübok tesem aika nung African Swine Fever (ASF) putetogo ta Kohima Deputy Commissioner Shanavas C, IAS-ia shi.

Kohima DC-isa Sechü Zubza ya Infected Zone ta sangoktsüogo aser iba ya kilometre 1 telongtet nung lir.

Külen, kilometre 10 Surveillance Zone ka latetogo.

District ketdangsurtemi latettsüba Zones nung ak tepsettsü memelar, ak bener aoba mesüra tangalen nungi bener aruba noktanger, ak chanu aser ak dak sendakba products shibanger, ta Kohima DC-isa metetdaksüogo.

Chandrayaan-3 ita nung anentetogo



Chandrayaan-3 ita nung anenzüketba sülen ISRO Chairman S Somnath-ia takok anguba temaitsü sayuba noksa nung angur.

New Delhi, August 23, 2023 (Agencies): India indang moon mission Chandrayaan-3 ita nung tua anenzüketeta otsü tasen ka yanglutetogo.

Chandrayaan-3 indang Vikram lander-ia tanü nikongdang 6.04 ako nung ita indang South Pole nung anenzüketeta liasü. South Pole nung anenzüketa linük mezüingbubaji India lir.

“India ita nung lir” ta ISRO chairman S Somnath-ia metetdaksü.

Prime Minister Narendra Modi-ia India nunger aser space scientists nem tenüngsang agütsü.

“Iba anogo ya India-ia kodanga mamatsü” ta PM Modi-ia shi.

“India-ia moon mission takok anguba ya India atema dang masü saka alima ajunga indang takok lir. Onoki alima ka, kibong ka aser tarutsü ka yimyim ayimba alima ajungalen prokshir. Moon mission ya kasa meimchir

dak rangloker inyaker anungji iba takok ya meimchir ajak meyong lir” ta PM Modi-ia metetdaksü.

Indian Space Research Organisation (ISRO) indang lunar mission tasembuba Chandrayaan-3 indang Lander Module (LM) ya July 14 nü kaketa yokba sülen August 2 nü takok ngua ita nung anenzükogo.

Taoba mapang USSR, U.S. aser China sülen ita nung soft landing sütetba linükji India lir.

Tanü nikongdang 6.03 ako nung Chandrayaan-3 indang Lander Module (LM)-ia ita nung anenzük. Iba mapang ISRO Telemetry, Tracking, and Command Network (ISTRAC), Bengaluru nung Mission Operations Complex (MOX) nung benjungtepa liasü.

Iba sülen Lander ajanga Rover itai yok aser iba ajanga in-situ chemical analysis asütsü. Taruba anogo 14 tashi rover Pragyan

ajanga ita indang noksatem yoktsü.

Ita nung anenzüktsü minute 20 shi lia ISRO-ia Automatic Landing Sequence (ALS) tenzüksü. Iba ajanga Vikram LM-ia on-board computers aser logic amshia ita nung anenzüktsü tesem bushi.

“Nisung ajak dang pelar. Taruba mission ji Gaganyaan (human space flight) lir. Onoki September mesüra October mezüing hopta nung iba mapa tenzüksü alizüing lir” ta ISRO chairman S Somnath-ia shi.

July 14, 2023 nü Chandrayaan-3 mapa tenzüka liasü. Iba anogo Sriharikota, Andhra Pradesh nung aliba Satish Dhawan Space Centre nungi anüingi kaketa yok. Iba sülen GSLV Mark 3 (LVM 3) heavy-lift launch vehicle ka ajanga August 5 nü spacecraft ji lunar orbit-ia yoka liasü.

Nagaland handloom & textile sector ketdangtsütsü bilemer

Kohima, August 23, 2023 (Agencies): Nagaland chief minister Neiphiu Rio-ia handloom aser textile sector timi azüoka ketdangtsütsü atema tebilemba lemsatep.

Bodbarnü Chief Minister’s Residential Complex nung handloom, textiles aser Naga designs ajungkettsü atema department balala senden ka amendang CM Rio-ia Nagaland nung textile industry ketdangtsütsü atema telatetba ka alitsü tebilemba shidanga liasü.

Nagaland nung textile industry ketdangtsüba den sorkari logistical support o training agütsüba den shishilembatsü asalentongtem yanglutsü indang CM Rio-ia lemsatep.

Nagaland nung textile industry

atema state-level body ka tentettsüla aser parnoki maparen ajak ketdangtsüba reprangtsü akok ta paisa ashi.

“Asenoki Naga sobaliba, inyaksangshi aser subosulemtsü wazüka ayutsüla. Tanü putu den peta asenoki shishilembatsüla” ta Rio-ia shi.

Women Resource Development & Horticulture Minister Salhoutuonuo Kruse-ia o jembidang tangalen nungi textile products bener arua amshiba atema tebilemtsü abenba lemsatep. Laisa tetsür nem tanü-asüing amshiba weaving technologies indang training agütsütsü aser designer creativity nung temulung agütsütsü olen ka ashi.

“Nagaland nung textile policy tajung ka aser weaver data atema

digital portal ka nungdaker” ta Industries & Commerce Advisor Hekani Jakhalu-ia shi.

“Asenoki sobaliba senmang wazüka ayutsüla aser tim mesüi amshiba noktangtsüla” ta Chief Secretary J. Alam, IAS-ia shi.

Paisa weaver wages ajema agütsüba indang tebilemtsü lemsatepdang wage policy den minimum wage determination ka latettsü olen ka shidanga liasü.

“Nagaland maittsü kümzüka ayutsü aser ajungkettsü atema technical support groups aser experts nungdaker” ta Alam-ia shi.

Iba sentong nung Women Resource Development aser Industries & Commerce Department temi presentations sayu.



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK

Yangia anidakangma :



Tir Yimyim



tiryimyim@aolima



tir yimyim

TAPAK 8

China Tir Xi Jinping-i BRICS tuluba akumtsü ayongzük

NZ coaching team nung Stephen Fleming denogo



VOL. XX NO. 312 (ADOK 312) DIMAPUR YANGTEPNÜ (THURSDAY) LUROI (AUGUST) 24, 2023 ₹ 5.00

Tanü nungi Ukhrul nung NSF mungdang tenzük

Ukhrul, August 23, 2023 (Agencies): Manipur kübok Ukhrul district nung August 24 nungi 26, 2023 tashi Naga Students Federation (NSF) lokti mungdang amongtsü.

‘Solidarity beyond Borders’ omen nung ajemdaker amongba mungdang nung Assam, Arunachal Pradesh, Nagaland, Manipur aser Myanmar nungi Naga kaketshir 1,200 shi adentsü.

Iba mungdang ya Tangkhul Katamno Saklong (TKS)-i achayanga Ukhrul jila nung amongtsü. Küm 30 sülen Tangkhul nung lima nung NSF mungdang amonger.

Mungdang lapokba sentong nung Nagaland MLA aser taoba NSF Tir Achumbemo Kikon aser Nagaland School Education and SCERT Advisor Dr Kekhrielhoulie Yhome nati alakteta jaokertem ama shilem agitsü

Maneni, Manipur Outer MP Dr Lorho S Pfoze-ia mungdang shibangba sentong nung adentsü.

Mungdang atemba sülen kümsük 2023-2025 atema NSF general election agitsü.

Mungdang tiptema amongtsü atema nisung ajaki National Highway memokdangtsü ayongzük ta mungdang ayongertemi metetdaksüogo.

Sorkari yimten telatetba ka agitsü: CM Biren Singh

Imphal, August 23, 2023 (Agencies): Centre aser Manipur sorkartemi raratep aser ozüing alema inyaksangshiba anendaktsütsü atema yimten telatetba ka agitsü meranger ta Manipur chief minister N Biren Singh-i ashi.

Manipur nung telok balala tsüingda olemtep aiben menaka tangatetep kati marutetba mapang ka nung CM Biren-i iba osang metetdaksü.

Pai Prime Minister Narendra Modi aser union home minister Amit Shah dena Centre sorkar den maneni osang metetpelaa arudar ta pai ashi.

Manipur nung yimjung aser tensa süngjemsü atema yimten telatetba ka yakta agitsü ta CM Biren-i ashi.

Manipur sorkari akokba tashi state nung yimjung aser tensa süngjemsü atema inyaka arur. Sorkar mapang shitak nung anema noktakerem samatsütsü, ta pai ashi.

Kin o kin tsüingda rara ajanga pei talidak toktsür jena aoertem yaritsüba sorkar indang mapa tongtipangtiba lir ta Biren-isa ashi.

Bodbarnü Manipur chief minister-i pei talidak toktsür aoertem nem Imphal East district nung aliba Sajiwa jail complex nung temporary shelter agitsü.

District balala nung nisung 400 anenzüketba temporary

shelter homes 6 tashi yangluogo, ta CM Biren-i metetdaksü.

“Manipur sorkari tesem 8 nung pre-fabricated houses yangludar. Bishnupur district kübok Kwakta nung ki 320, Sajiwa nung 400, Imphal East kübok Sawombung nung 200 aser Thoubal district kübok Yaithibi Loukol nung ki 400 yangludar” ta paisa metetdaksü. m

“Taruba anogo 10-15 tsüingda lendenlen ki belentsü. Onokisa tesem aika nung permanent structures yanglutsü survey tenzükogo” ta paisa ashi.

“Kangpokpi aser Churachandpur district tem nung tera menutsü. Kangpokpi district nung kibong 700 atema tesem ana repranga lir. Churachandpur nunga tesem ka shimogo” ta CM Biren-isa ashi.

“Prangpong amshia amakba anenogo. Tensa süngjemogo ta onoki bilemer. Nisung ajaki yaritepba ajanga tensa azüoktetogo” ta Manipur CM-isa ashi.

Manipur nung Meitei nungeri Scheduled Tribe (ST) meshiba anema taküm May ita hill district tem nung Tribal Solidarity March ka alidang kin o kin mepetmesü adoka raratep.

Iba anogo nungi tenzük tatalokba balala nung nisung 160 tema süogo aser aika yiru.

Kohima nung ASF osang metetdaksür

Dimapur, August 23, 2023 (TYO): Kohima District kübok tesem aika nung African Swine Fever (ASF) putetogo ta Kohima Deputy Commissioner Shanavas C, IAS-i ashi.

Kohima DC-isa Sechü Zubza ya Infected Zone ta sangoktsüogo aser iba ya kilometre 1 telongtet nung lir.

Külen, kilometre 10 Surveillance Zone ka latetogo.

District ketdangsürtemi latettsüba Zones nung ak tepsettsü memelar, ak bener aoba mesüra tangalen nungi bener aruba noktanger, ak chanu aser ak dak sendakba products shibanger, ta Kohima DC-isa metetdaksüogo.

India'er Chandrayaan-3 ita nung anentetogo



Chandrayaan-3 indang Lander Module (LM) ita nung anenzükba sülen ISRO headquarters nung scientist tem pelatepba angur. (Bengaluru, August 23)

New Delhi, August 23, 2023 (Agencies): India indang moon mission Chandrayaan-3 ita nung tua anenzüketeta otsü tasen ka yanglutetogo.

Chandrayaan-3 indang Vikram lander-i tanü nikongdang 6.04 ako nung ita indang South Pole nung anenzüketeta liasü. South Pole nung anenzükba linük mezüngbubaji India lir.

“India ita nung lir” ta ISRO chairman S Somnath-i metetdaksü.

Prime Minister Narendra Modi-ia India nung aser space scientists nem tenüngsang agitsü.

“Iba anogo ya India-i kodanga mamatsü” ta PM Modi-i ashi.

“India-i moon mission takok anguba ya India atema dang masü saka alima ajunga indang takok lir. Onoki alima ka, kibong ka aser tarutsü ka yimyim ayimba alima ajungalen prokshir. Moon mission ya kasa meimchir

dakrangloker inyaker anungji iba takok ya meimchir ajak meyong lir” ta PM Modi-isa metetdaksü.

Indian Space Research Organisation (ISRO) indang lunar mission tasembuba Chandrayaan-3 indang Lander Module (LM) ya July 14 nü kaketa yokba sülen August 2 nü takok ngua ita nung anenzükogo.

Taoba mapang USSR, U.S. aser China sülen ita nung soft landing sütetba linükji India lir.

Tanü nikongdang 6.03 ako nung Chandrayaan-3 indang Lander Module (LM)-i ita nung anenzük. Iba mapang ISRO Telemetry, Tracking, and Command Network (ISTRAC), Bengaluru nung Mission Operations Complex (MOX) nung benjungtepa liasü.

Iba sülen Lander ajanga Rover itai yok aser iba ajanga in-situ chemical analysis asütsü. Taruba anogo 14 tashi rover Pragyan

ajanga ita indang noksatem yoktsü.

Ita nung anenzüktsü minute 20 shi lia ISRO-i Automatic Landing Sequence (ALS) tenzüktsü. Iba ajanga Vikram LM-i on-board computers aser logic amshia ita nung anenzüktsü tesem bushi.

“Nisung ajak dang pelar. Taruba mission ji Gaganyaan (human space flight) lir. Onoki September mesüra October mezüng hopta nung iba mapa tenzüktsü alizüing lir” ta ISRO chairman S Somnath-i ashi.

July 14, 2023 nü Chandrayaan-3 mapa tenzükba liasü. Iba anogo Sriharikota, Andhra Pradesh nung aliba Satish Dhawan Space Centre nungi anüingi kaketa yok. Iba sülen GSLV Mark 3 (LVM 3) heavy-lift launch vehicle ka ajanga August 5 nü spacecraft ji lunar orbit-i yoka liasü.

Nagaland handloom & textile sector ketdangsütsü bilemer

Kohima, August 23, 2023 (Agencies): Nagaland chief minister Neiphiu Rio-i handloom aser textile sector timi azüoka ketdangsütsü atema tebilemba lemsatep.

Bodbarnü Chief Minister’s Residential Complex nung handloom, textiles aser Naga designs ajungkettsü atema amandang CM Rio-i Nagaland nung textile industry ketdangsütsü atema telatetba ka alitsü tebilemba shidanga liasü.

Nagaland nung textile industry ketdangsüba den sorkari logistical support o training agütsüba den shishilembatsü asalentongtem yanglutsü indang CM Rio-i lemsatep.

Nagaland nung textile industry

atema state-level body ka tentettsüla aser parnoki maparen ajak ketdangsüba repringtsü akok ta paisa ashi.

“Asenoki Naga sobaliba, inyaksangshi aser subosulemtsü wazüka ayutsüla. Tanü putu den peta asenoki shishilembatsüla” ta Rio-isa ashi.

Women Resource Development & Horticulture Minister Salhouonuo Kruse-ia o jembidang tangalen nungi textile products bener arua amshiba atema tebilemtsü abenba lemsatep.

Laisa tetsür nem tanü-asüing amshiba weaving technologies indang training agütsütsü aser designer creativity nung temulung agütsütsü olen ka ashi.

“Nagaland nung textile policy tajung ka aser weaver data atema

digital portal ka nungdaker” ta Industries & Commerce Advisor Hekani Jakhalu-ia ashi.

“Asenoki sobaliba senmang wazüka ayutsüla aser tim mesüi amshiba noktangtsüla” ta Chief Secretary J. Alam, IAS-ia ashi.

Paisa weaver wages ajema agütsüba indang tebilemtsü lemsatepdang wage policy den minimum wage determination ka latettsü olen ka shidanga liasü.

“Nagaland maitsü kümzüka ayutsü aser ajungkettsü atema technical support groups aser experts nungdaker” ta Alam-isa ashi.

Iba sentong nung Women Resource Development aser Industries & Commerce Department temi presentations sayu.

TaFMA-i Voice of Nagaland & Excellence Award 2023 ayongzüksü



Kohima, Luroi/August 23 (TYO): Task Force for Music & Arts (TaFMA)-i Investment & Development Authority of Nagaland (IDAN) ajanga yakta The Voice of Nagaland aser TaFMA Excellence Awards 2023 ayongzüksü.

Iba sangdong ya Advisor to Chief Minister Nagaland aser Chairman IDAN, Abu Metha-i RCEMPA Jotsoma nung Mongulbarnü osangbener senden ka nung Toyota Nagaland CEO Hokugha Yeptho, TaFMA Advisor Theja Meru aser Project Director TaFMA nungertem lia metetdaksü.

Voice of Nagaland indang anogo aser iba dak sendakba osang tejangja ya TaFMA indang social media ajanga sangdongtsü aser tetoktepba ya 'genres' ajak nung aser English, Hindi, Nagamese aser danga Naga nung oshi nung alitsü, ta Metha-i ashi.

Excellence Awards atema Naga nung jenjang balala nung takok angurtem indang application tem TaFMA ket tongogo aser award angutsüpur tenüing ya sentong balaka agidang sangdongtsü, kong Chief Minister Neiphiu Rio adentsü, ta pai ashi.

Iba sentong tulu anaprong ya

Nagaland Hornbill Festival metenzükdang amungtsü, ta ashi.

Paisa Okusa Toyota-i ano maneni TaFMA den lungjemer Hornbill Music Festival 2023 nung senotsü agi yaritsü aser ano Voice of Nagaland aser TaFMA Excellence Award indang senpet tem sponsor asütsü, ta ashi.

Iba tetoktepba anaprong nung takok angur nem Toyota-i gari tasen ka-ka agütsütsü, ta Toyota CEO Hokugha Yeptho-i ashi.

Ajisüaka gari ya koba model asüjar ajibo ano telemtetba mali, ta pai ashi.

Food & Civil Supplies ajanga awareness sentong ayongzüksü

Dimapur, Luroi/August 23 (TYO): Government of India policy nung aliba ama 'targeted population nem National Food Security Act, 2013 (NFSA) kübok ICDS, PM POSHAN aser PDS ama scheme balala ajanga linük tesem ajunga nung phase lemsar Fortified Rice agütsür, ta Assistant Director, Food & Civil Supplies, Dimapur, S.Kavito Aomi-i sangdong ka ajanga

metetdaksü. Iba dak sendakba nung Department ajanga PATH, Technical partner den lungjemer, social media nung plastic jang indang osang tiazü prokshiba jangjatsü asoshi state tesem ajungalen awareness sentong balala ayongzük.

Dimapur nung iba Awareness Programme ya IMC Hall, Fellowship Colony, Dimapur nung August 29, 2023

anepdang 11:00 ako nungi tenzüka Dimapur, Chümoukedima aser Niuland district tem atema ayongzüksü.

Anungji item district asem kübok FPS, Village Councils, Colony Chairmen aser Urban GBs tem iba awareness sentong nung dena Fortified Rice atema nüburttem nem osang agütsütsü ayongzük, ta sangdong ajanga ashi.

10th Nagaland Spelling Bee Championship ayonger

Kohima, Luroi/August 23 (TYO): Fountain Club ajanga State Council of Educational Research and Training (SCERT), Nagaland den lungjemer 10 buba Nagaland Spelling Bee Championship sentong RCEMPA, Jotsoma nung October 5 aser 6, 2023 anogotem ayongzüksü.

Iba Championship ya Morung Express (Press Media), Excellogics Tech Solution Pvt Ltd (Information Technology), Crystal Network Media (TV)

asir Mirrorless Films (Social Media) den lungjemer ayongzük alitsü.

Nagaland nungi recognized school/institution temi nisung ana-na yoktsü akok, shilem agirtem ya class 6 nungi 9 tsüingta azünger kaketshir asütsüla, aser shilem agitsü asoshi reju tekolakba nungi yoktsüla.

Contest Rules aser regulations aser Participation Forms ya www.fountainclub.in, www.morungexpress.com aser www.excellogics.co.in nungi

download sütettsü. Form ya DIETs Centres ajak nung angutsü.

Champions nem senpet tajung agütsüba den külemi 1st, 2nd aser 3rd Runners Up, Quarter Finalists ajak aser Young Speller ka nem sempet agütsütsü.

Shilem agir ajak nem kulizüing kakets agütsütsü, ta organizing committee convenor Vipopal Kintso aser secretary Ako Zhasa nati sangdong ka ajanga ashi.



Singrijan Rangapahar, Chümoukedima nung August 23, 2023 nü Shree Shree Shiv Mandir Diamond Jubilee amungdang Nagaland Angh, La Ganesan-i jembiba noksa nung angur.

Untrained Hindi Teachers dang metetdaksür

Dimapur, Luroi/August 23 (TYO): School Education Office ajanga taoba mapang sangdong agüja aliba ama Directorate of School Education kübok inyakba untrained Hindi Teachers (Diploma Certificate Holder) shirnoki tang tashi Class 12

tashi General Qualification Certificate magütsü ali, parnoki iba kulizüing kakets ya August 26, 2023 tashinung SCERT nem agütsütsü metetdaksüogo.

Ibai session 2023-2025 atema D.El.Ed admission asoshi lir, ta sandong ka ajanga ashi.

KPC tongti zülur inyaksü Vishu Rita Krocha shimogo

Kohima, Luroi/August 23 (TYO): Kohima Press Club indang General Secretary post asoshi by-election sentong August 23, 2023 nü APO Building Complex Kohima nung aliba KPC Office nung kanga tiptema agia liasü.

electors 50 aliba nungi 39-i vote agüja liasü aser Vishu Rita Krocha ya KPC indang tanüingba 2022-25 kümsük inyaksü shimtet.

Chief Election Commissioner Narayan Bahadur den Commissioners Krushal Charen Momin aser Nchumthung Odyuo nung temi Krocha nem takok anguba kulizüing kakets agüja liasü.

Iba mapa inyaksü asoshi jangra alir par asem - Vishu Rita Krocha, Seyiekietuo Keretsu aser Loreni Tsanglao atema



National Tobacco Control Programme aser Mon Town Students' Union kübok Enforcement Squad ajanga Mon Town nung kakets reju anasa apuba moko agi yangluba osettem August 23, 2023 nü raksa indoktsüdang tangokba noksa nung angur.

DC ajanga Kohima nung traffic temelenshi kar metetdaksü

Dimapur, Luroi/August 23 (TYO): Deputy Commissioner Kohima, Shanavas C IAS ajanga state yimtiba nung traffic ozüing dak sendakba nung nüburttem nem sangdong ka agüja liasü.

Latetja aliba anogo aser mapang nung gari kata Tinpati nungi NHAK lemjem leni aotsü memelatsü.

Sangdong ajanga ashiba agi, Naga Hospital Colony nungi Tinpati (Census Junction), New Market, Daklane, Naga Bazaar, Kezieke, aser Pezielitsie ajaga aoba lenmang ya Hombar nungi Kokulbar tashi anepdang 10:00 ako nungi anüingdang 12:00 ako tashi "ONE-WAY-DOWN TRAFFIC" alitsü. Ibai August 28, 2023 nü nungi tenzüka amshitsü.

High School len nungi town leni adokba gari tem akhi mapang jajaba lenmang, High School - Tinpati - Razhii Point amshitsü ajungshir, ta sangdong ajanga ashi.

Iba latetja aliba mapang gari tem Naga Hospital Colony nungi Tinpati tashi 'downward direction' nung jajatsü melatsü.

High School aser Nagaland Civil Secretariat Area leni aiba Light Motor Vehicles (LMVs) tem 'box cutting', NHAK lemjem aser Census Junction, Tinpati len nungi paizüka aitsü ajungshir.

Nüburttem kumzüka ayutsü mechi iba mera ya Regional Transport Authority aser tim colony/sector ketdangsurtem den shisa agitepa jembir agir, ta sangdong ajanga ashi.

CEO Office ajanga SVEEP Logo design yanglutepba ayongzük

Dimapur, Luroi/August 23 (TYO): 2023-24 küm asoshi SVEEP Campaign (Systematic Voters' Education and Electoral Participation) nung shilem ka ama Office of the Chief Electoral Officer, Nagaland ajanga SVEEP Logo yanglutepba sentong ka ayongzüka liasü.

Vote Matters" liasü. Iba tetoktepba nung logo tajungtiba ya Kohima district nungi David Shitio-i yanglua liasü.

Iba tetoktepba omen ya "My

Pai takok anguba temaitsü David Shitio nem senpet sen 15,000 agütsü. Iba senpet agütsüba sentong ya August 23, 2023 nü Ruokuovituo Khezhie, CEO (Officiating) indang office chamber nung agia liasü.

Modi aser S Africa Tir nati linük ana tesendaktep atema jembio



August 23, 2023 nü Johannesburg nung BRICS senden alidang jurila senden ka nung India Ato kilonser, Narendra Modi-i South Africa Tir, Cyril Ramaphosa den senden amendang tangokba noksa nung angur. Kasa noksa nung Foreign Minister, S Jaishankar-a angur.

Johannesburg, Luroi/ August 23 (Agencies): Bodhbarnü Ato kilonser, Narendra Modi aser South Africa Tir, Cyril Ramaphosa na senden mena tenati linük ana tsüingda tesendaktep ano tajungba akümtsü atema onük balala nung o lemtepogo.

Ato kilonser Modi August 22 nungi 24 tashi BRICS senden nung adentsü atema South Africa-i oa lir. BRICS senden tembangba sülen pai Greece-a semdangtsü.

Modi-i twitter ajanga, "Tir @CyrilRamaphosa den senden junga menogo," ta lemsatep.

"India-South Africa tesendaktep tajungba akümtsü nükjidong nung künati onük aika nung o lemtepogo. Talisa shishilembaba, defence aser investment tsütsü tesendaktep atema jembio. Global South

atema longjemer inyaksü," ta paisa metetdaksü.

Global South nung nütsüing aika aliba tongtibang linüktemji Brazil, India, Indonesia aser China den Nigeria aser Mexico lir.

New Delhi nungi apusotsü lia Modi-i, "BRICS-i lenla balala nung amaliteptsü inyaksü meranger. Global South nung tebilemstsü onüktem benoka o lemteptsü atema BRICS ya sabang ka kümogo," ta metetdakja liasü.

Mongolbarnü Modi den China, South Africa aser Brazil linüktem nungi tongti lenirtem Leaders' Retreat nung shilem agia aden.

BRICS senden nung adentsü atema Russia Tir, Vladimir Putin bo Johannesburg-i moutet. BRICS züingsem linüktemji Brazil, Russia, India, China

asir South Africa lir.

Ministry of External Affairs (MEA)-i sangdong ka ajanga, "Alima nung tayongzükba onük balala atema lenmang bushitsü asoshi BRICS sabang ya lenirtem atema maongka lir," ta metetdaksü.

Mongolbarnüsa Modi BRICS Business Forum Leaders' Dialogue nunga aden, aser iba senden nungji Modi-i shishilembaba tezübaba akümtsü atema India-i inyakba mapatem metetdaksü.

Paisa BRICS business lenirtem dang India nunger terenlok lenmang nung shilem agitsü ajungshi.

Johannesburg nungsa Modi-i BRICS-Africa Outreach aser BRICS Plus Dialogue sentongtem nung shilem agitsü aser lenirtem den jurila senden amentsü.

Modi sorkari states/UT 18 nem MGNREGA taa tagütsütsü lir: Congress

New Delhi, Luroi/August 23 (Agencies): Borhbarnü Congress party Tir, Mallikarjun Kharge-i, Modi sorkari union budget nung MGNREGA scheme atema senotsü shilem asemsü nungi shilem kabo ajemtsüyonga sorkari states aser Union territories 18 nem MGNREGA taa sen crore 6,366 tagütsütsü lir, ta metetdaksü.

Paisa 2005 küm iba anogo (August 23) nung Congress sorkari yimtsüingtem nung aayangtsü atema maongka agütsüba scheme MGNREGA benokba atema tenüngsang agütsü.

"2005 küm iba anogo nung Congress-i aniba UPA sorkari nisung crore aika nem mapa inyakba temeden agütsütsü atema MGNREGA scheme tenzüik," ta pai metetdaksü.

"Taküm Modi sorkari MGNREGA budget shilem 33 ajemtsüoggo aser states den union territories 18 nem MGNREGA sen crore 6,366 tagütsütsü lir. Congress sorkari tenzüikba scheme ya ajanga nisung crore 14.42 tajangzük angur aser shilem tesadang nungi teimbakabo tetsürtem lir," ta Kharge-i X (taoba mapang twitter) ajanga metetdaksü.

"Coronavirus wara mapang

nunga MGNREGA ya tekümsüker ka liasü aser aayanger crore aika tajangzük nguogo," ta paisa metetdaksü.

Congress-ia, iba anogo nung taoba Ato kilonser Manmohan Singh lenisüba nung MGNREGA scheme agizüka liasü, ta metetdaksü.

Congress-i X ajanga, "Nisung million aika taküm alitsüsa security agütsür. Wara mapang income shilem 80 takoksa angu saka MGNREGA ajanga alangzük, iba denji külemi nüburtem taküm alitsü atema timtemba mapang nung tongti shilem agi," ta metetdaksü.

Lok Sabha election nung BSP-i tangar den melokteptsü: Mayawati

Lucknow, August 23 (Agencies): Bodhbarnü Bahujan Samaj Party (BSP) tongti lenir, Mayawati-i, sangküm Lok Sabha election nung Uttar Pradesh nung lar party-i tangar den meloktepi tokteptsü telemtetba agiogo, kechiyong teloktep nung adenba ajanga lar party-i kecha majangzük, ta metetdaksü.

Bodhbarnü Lucknow nung BSP lenirtem senden amenba mapang nung Mayawati-i, "Uttar Pradesh nung teloktep kar nung adenba ajanga BSP-i tajangzük anguba dang nungibo takoksa ang tuluba angur," ta ashi.

"Anungji onoki sangküm parliamentary elections nung kijai tokteptsü telemtetba agiogo," ta taoba mapang chief minister, Mayawati-i metetdaksü.

Laisa party nung lenirtem dang yimtsüingtem nung tenzüka senden ayongzüka amenba ajanga party organisation tashi itdaksütsü tuyu.

BJP-i aniba National Democratic Alliance teloktep aser opposition teloktep INDIA (Indian National Developmental Inclusive Alliance) naprongla aija lai, parnoki sangküm Centre nung sorkar akümtsü, ta jembiyonga parnok yimsüsüba menden nung aliba mapang nung parnoki nangzükba ama meinyaker, ta ashi.

"Teloktep anaprongla jagi

tekübok jenjang nung aliba nüburtem atema junga meinyaker. Parnoki tilateri politics asaya-a telemsa adokdaksür aser loktiliba tashi meitdaksür. Anungji parnok dang nungi pilaa alibajisa tajungba," ta lai ashi.

Laisa sangküm Lok Sabha election atema party candidates kanga kumdanga shimsüla, ta ashi.

Uttar Pradesh nung BJP jenjang tamajungba kumdar, kechiyong osettsüset nung jenjang atuba, sensak tia, mapa manguba tebilemstsü aser tesempa ajanga nüburtem timtemdar, ibayongji nüburtemi joko iba talenba nungjagi salaner, ta Mayawati-i ashi.

Congress party den kasa BJP-a jembiba aser inyakba na tsüingda ongdang (tetsüingda) tulu itta lir, ta lai ashi.

Tamalen Uttar Pradesh assembly election aser Lok Sabha election mapang BSP-i Samajwadi Party aser Congress na den loktepa liasü.

Taoba election nung BSP-i SP den lokteper toktep. Tang Lok Sabha nung BSP MP ter lir aser UP assembly nung BSP MLA kar lir.

2017 küm UP assembly election nung BJP-i menden 300 dak tema nung takok angu, BSP-i menden 19 dang angu aser Samajwadi Party (SP)-i menden 47 dang ngua liasü.



August 23, 2023 nü Kolkata nung West Bengal Angh, CV Ananda Bose-i taoba mapang Sikkim nung DGP, CM Ravindran nem 'Governor's Karmayogi Excellence Award' agütsüdang tangokba noksa nung angur.

Mamata-i aayangertem dang West Bengal-i meyipa arutsü ajungshir

Kolkata, August 23 (Agencies): Bodhbarnü Trinamool Congress tongti lenir aser West Bengal Chief Minister, Mamata Banerjee-i Bengal nungi tanga state balalai oa aayangertem dang pei kidangi meyipa aruba sülen shishilembaba mapa inyaksü ajungshi.

Kolkata nung MSMEs sentong ka nung jembidang lai, state sorkari state nungi tangalen oa aayangertem tenüng bendentsü; ibaj maparenji 'Duare Sarkar' (government at doorstep) camps nung inyaksü, ta metetdaksü.

"Kechiba nenoki sorkari agütsüba loan lakh 5 magii tanga state temi aoyer? Kechiba tangalen mapa inyaksü atema nenoki ner kibong toktsür aoyer? Ni nenok ajak dang meyipa arutsü mepishir," ta laisa metetdaksü.

Kasa sentong nungsa lai state nung investment atema lar sorkari inyakba mapa balala metetdaksü.

Kasa sentong nung lai video conferencing ajanga sorkari Kolkata kübok Dakshinapan nung lapokba showrooms aser Purba Medinipur kübok New Digha nung lapokba showrooms semzüksütsü.



August 23, 2023 nü Jantar Mantar, New Delhi nung Petrol Pump Dealers Associations nungi züingsemtemi 'One Nation, One Rate' anema longkak aيتدang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI(AUGUST) 24, 2023

Kinungtsü ka dang ayutsüla

Tang ya asen kidanger Assam nung state government-i tebur shia kinungtsü ka dak tali magitsü aser mayutsü atema ozüng ka latettsü merangba mapang lir. Atangji, tanga tamangba yimsü amangertem asoshibo tebur ka asoshi kinungtsü ka dang agitsübaji pei sobaliba aser tamangba yimsü dak keta lir, anungji kecha balaka ozüng tasen ka menüngdaker. Ajisüaka, Muslim nungertembo parnok Shariat ozüng agi tebur kati tetsür ka dak tali agitsü melaa lir, anungji tanü asen lima nung alir Muslim nunger teburtema aikati kinungtsü ka dak tali ayuba asenoki angutsü. Muslim nungertem asoshibo tebur kati kinungtsü pezü den alitsübaji parnok temeshi lai Quran tekong 4:3 nung shia lir. Aji oda, Muslim nunger tebur kati pai dang anepalu sütetdi süra Quran nung shia aliba amaji, mapang ka nung tebur kati tetsür ka dak tali agitsübaji tim dang lir ta parnoki amanga benschir, kechiyong parnoki amangba ainker Prophet Muhammad-ia kinungtsü aika agia liasü ta parnoki jembir. Atangji, akhi tejen Lai mapang asenok Laishiba nunga tanga chubatemjibo yutsür, Tsüngremi mulung achiba David chubaia pa kinungtsü 8 agiba angur aser ano par jabaso aser Solomon-ibo pa kinungtsü 700 ayuba dak jangramatem ano pa medemtsü atema tetsür 300 ayuba asenoki Laishiba nung angur. Tetezü, Solomon chubabo mapang kasa nung tetsür 1000 den lia liasü ta asenoki angatetter. Ibaji dang masü saka tanüa asenok rongnunga akhi chuba yimsüsübaren mesendoki aliba kin kar nungbo par chubabo kinungtsü ka dak tali ayutsü melar. Item ajakji tetsürtemi mulungba aser parnok anisüngzüka alitsü asoshi masü saka teburtem jangratemtsü aser loktiliba nung tenüng keta jenjang ka atutsü atema tentetba sobaliba ka dang lir. Atangji, akhi chubatem mapang nungi tang Muslim nungertem benschiba kibakiyimba sobaliba yagi tetsürtem nem masü saka teburtem nem dang apuani ka dak tali den alitsü tashi aser temelaba agüja lir, tetezü kinungboibo pa mezüng kinungtsü den lia ano tangar tetsür talila asem anir arua parnok külemi alitsüa akok saka kinungtsü katibo kinungbo ka dak tali ayutsü makok. Iba ama sobaliba tamajung ajak Khristan yimsü ajanga melenshidaktsü nungji, tangbo Khristan-tem asoshi tebur kati kinungtsü ka dak tali agitsü memelar. Kasaji Hindu nunger sobaliba aser ozüng nunga akhidangbo parnok rongnung temaba kin purtem karbo kinungtsü ka dak tali ayutsü melaa liasü, ajisüaka tanübo linük temzüng kübok Hindu nunger ozüng ajanga tebur kati kinungtsü ka dak tali agitsü memelar. Atangji, tamangba yimsü mashiyonga, tebur ka asoshi kinungtsü ka dang alitsübaji tasüngtet aser tebetet sobaliba ka lir. Iba jagi kibonga tipdema alitsü aser alima nung tebilemstü asütsüsa nütsünga tali merenloktsü. Ajisüaka, Muslim yimsü nung tebur kati kasa mapang nung pa kinungtsü 4 tashi ayutsü melabaji kibong dang masü alima tipmadem kümdaktsür. Kibong nung tetsür kati asoba chirutem mesütsüa tebur ka asoshi tasak, ajisüaka tetsür pezüi asoba chirutem tebu kati mesütsübaji tebilemstü tulu lir. Iba ama kibong tulu junga achaayang mesütetba kibongtem nungi intetba tanurtem mulungjang nung tejashi, tenükmerem aser tamajung bilemba agi sünga alir, iba jagi Muslim limatem anisüngzüka melitetba asenoki angur. Tanü India nunga Muslim nunger nütsüng renlokba agi, talisa, Hindu nungertem shisabolur. Iba jagi tang India nung BJP teloki aniba government-i linük nung sobaliba temzüng ka dang asütsü asoshi Uniform Civil Code (UCC) latettsü meranger. Atangji, Hindu nunger dang masü saka asenok asoshia Muslim nunger nütsüng renloker aser asenokbo ajemer ta asüba ya shisabolutsü tulu, anungji asenoki sobaliba tesem aika nung magizüktetaka ano tesem kar nungbo UCC nungdakba tesema reprangteter. Iba kasa tebilemstü jagi linük nung ozüng küma melatettetaka, Assam nungbo tebur kati kinungtsü ka dak tali agitsü memelatsü asoshi ozüng küma latettsü meranger. Iba kasa ozüngji Nagaland nunga latettsü nungdaker.

OLEMSABANG

TENLAKI YA TSÜNGREM KÜLEMDAK ASER PULPIT YA TSÜNGREM O ANGANÜDAK SABANG

~ L. Kika Pongener

Asenok ajak Khristan tamanger dang asünung, Tenlaki ya Tsüngrem külemdak tesem, Tsüngrem ajurudak tesem, Tsüngrem den sensak-asedmak tesem, Tsüngrem tenüng asangdak tesem, aser Tsüngrem dang sarasademba tesem-a ta kanga junga angateta lir. Asen Aotsür Aor balaka Khristan yimsü agizüka tamanger kümer, jokorla küm-150 suia amangertem dang asünungji, shingaia shinga sayutsüngitsü mali, ajunga tamang nung teinet rogotem dang lir. Jokorla, Aor tamangertembo Tanela jenjang nunga mola-moshia sungadoker, moozüka yimzüka aluba jagi tangar Yisu Khrista indang khenyongi mangashidangertem, memetetertem, limapurtem, mamangertem dang sayutsüngitsüba aser Yisu Khrista dangi anir arutsüba mapang lir. Anungji iba ama tamang jenjang nung teinet rogotem dang tenla kidang Tsüngrem külemdak kechi koda külemtsüla (?)...ta sayutsüba mapang masü. Ajisuaka, kanga tesasatsüka, khen-khenbo ano tamang nung kinutem amai, yashi-ang tamang yimsü agizüka amangertem amai inyaka benschiba angudang kangasa sasasetta bilemer. Anungji asenok ajaki Tenlaki ya lokti-senden alidak ki (Community Hall) ka den memeyoktepli, Tenlaki ya lokti tulu adenshidak aser mongdang-mongchi sentepdak ki (Auditorium) ka den memeyoktepli, Tenlaki ya asayadak moapu (Stadium) ka den memeyoktepli, Tenlaki ya chidiyungdia/japojaria tsüngsangtepdak ki (Star Hotel) ka den memeyoktepli, aser Tenlaki ya wawamenudak/asayadak tesem (Ampiteatre) ka den memeyoktepli. Tsüngrem o-i ashir, "Kibuba kidangi aodang na kümdanga jajang" ... "Ya tanga masü saka Kodak kikümbang". Anungji asenoki külemba Tsüngremi agizüktettsüsa ajemalua, sungjem-sungjema aser meraketa külemdi.

Tanü lanurtemi kanga junga angatettsüba tongtipang kaji, tenla kidang Tsüngrem külemdak, Tsüngrem tenüng asangdak aser Tsüngrem dang sarasademba kidang, Hindi Film nung adenba ken aser Rock ken tena, sungyanglu aser mojing külemba yimya nung tsüngsanga külemra, ibajagi Tsüngrem peladima...??? Hindi Film nung adenba ken aser Rock ken ya teimba ka 'Nükunarar meimtepba ken' (Love song), shi azü-apong/japojari ken aser Mojing külemba ken teimba lir. Ibaji onok tsüraburtem dang nungi nenokiang kanga agia tajungba meteta lir, saka meteter sernung memetet amai inyakba jagi onok tsüraburtem temulong agi maremi jembir dang. Aji oda, Hindi ken asüyongjia Tsüngrem külemba ken (Devotional Song)-a karbo lir. Ajisuaka, item Tsüngrem külemba ken asüyongjia item ken-jia, sungyanglu külemba ken asünungji, Khristan-tem tenlaki ka nung iba ama ken atentsübaji mapet aser Tsüngrem tsüngdang aibelener asütsü. Talisa, tenla ki ya waaaa...ooooaaa...waaooo...ta ola adoka asaperangtepa aser piii...peeee...poooo...ta aposhitepa pelateptsüba tesem ka masü. Tenlaki ya 'Fashion Show' aliba ki masü aser 'Beauty Contest' aliba ki-a masü. Anungji Tenla kidangi suoshi mashi-mashi subor marutsüla, talisa, shi ateta anguba suoshi (Sexy dress) aser teko sateta mesura tepi tazüng ajunga ngua...yamala tenük jalotsü suoshi tenla kidangi subor khenyongi marutsüla. Lanur kari mangateti inyaka benschia lira tsüraburtemi metongshitsütsüla aser angatetdaksütsüla.

Aji oda, tanü putu tensa den apet lanurtem jangrapangradaktsütsüba aser anir arutsüba atema asaya tapu balala, sai-sapong, wawamenu aser sempet sala-a sayutepba (Talent Presentation) yamala sentong kar ayongzüka linura, Tenla kidang masü, moapu tesem kar nung, mesura Hall kar nung agiba kanga agi tajungba asütsü. Tanü alima putu kara-a ainba den jangyumedema lanurtem tekülem sentepi arutsü mejangrartem, Tsüngrem o angatsü mejangrartem, aser lanur sentepi kodanga marurtem anir arutsü atema tasa tapu balala atonga, sentong tapu balala agi anir arutsü meranger, ajia mapa tamajung masü tajung lir. Ano tanü lanurtem anir arutsü atema tekülem sentep nung 'Praise and Worship' kongki ola tapu aika dema, tsüngsangtepa ken atenba, ajia tanü tensa den apet tamajung masü sentong tajung lir, saka item ajak nungji Tsüngrem külemba ken (Devotional Song) tena shilem agira, ibajagi Tsüngrem tali sentsüwangshidaktsütsü aser tekülem nung adenertema temoatsü angutsü. Tanü putu ya kechisarena ajak nung kanga kümdangtsüba putu ka lir, kechiyong tang kechi ataloker aji second-minute tsüngda nung alima sunga-adoker. Tatishitsü...Tanü tenla kidang sentong kar agiba nung kechi shilem agir, item ajakji iba second-minute nungji Social Media ajanga alima sunga-adoker. Anungji shirnoki kechi shilem agidir agiaka kanga kümdanga shilem agitsüla.

Ano Pulpit ya temeshi sabang, tenladak sabang aser Tsüngrem o sayutsüngidak sabang... ta asenok ajaki angateta lir. Pulpit nungi Tsüngrem lartemi santem nem tanela chiyungtsü anganua agütsür. Anungji tekülem sentep nung shirnoki Pulpit nung nokdaker shilem agidir, akok tashi suoshi-a tenük jalotsü suoshi masü, saka tekülem yimya nung 'Decent Dress' subor shilem agitsüla. Ano kanga tongtipang kaji...Tsüngrem lar shirnoki Tsüngrem o jembidir, akokba tashi tekülem nung adener ajunga temoatsü angutsüsa kanga junga renemer jembitsüla. Pulpit nungi Tsüngrem o jembidang indang-indanga Tsüngrem o dang jembitsüla. Aji oda, Tsüngrem o agi anar tekülem nung adenertem temulong yirutsütsüsa mejembitsüla. Pulpit ya Tsüngrem tenzükertem tsüngda nung mepelatepba aser inyakyim kar nung mulong masüba meyiptsüba aser langzütepdak sabang ka amai mamshitsüla. Pulpit ya pei mulong machiba tejashi sunema jembidak sabang ka amai mamshitsüla. Pulpit nung pei shi mulongba o tzuratema jembidangji Tsüngrem o tajung ajak-to talaktsü o ka kümdaktsür aser temoatsü angutsü melena temulong yirudaktsür. Arogopurtem hopta piyonga ali wadang balala nung anibelega inyaker, Tsüngrem külemtsü aser Tsüngrem o angatsü yongyasetta sentepi arunung, temulong yirudaktsüra tekülem sentepi arutsü mejangrai kümdaktsür. Anungji asenok tamanger ajaki Tenlaki ya Tsüngrem külemdak aser Pulpit ya temeshi sabang ta angateta asüngteta, meshiteta aser meraketa yudi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Delhi nung Khristantem tekülem tagidak mapang amak



August 20, 2023 nü East Delhi nung Khristantem amakba sülen Bajrang Dal züngsemtem Police station kima adenshia aliba noksa nung angur.

New Delhi, August 21 (Agencies): Taoba Amongnü India linük yimtiba, New Delhi nung Khristantem tekülem sentong agiba mapang nung Hindu yimsü alia amangertemi amakba mapang nung Khristan pongu yiruogo.

August 20, 2023 nü East Delhi kübok Tahirpur area nung aliba Siyyon Prathna Bhawan nung Khristantem sarasademba mapang nung Bajrang Dal züngsemtemi amak.

Bajrang Dal züngsem 100 shi tekülem ki telung jagi aitba sülen "Hindu Rashtra Banayenge. Jai Shri Ram" (Onoki iba linük ya Hindu linük kümdaktsütsü" ta ayimdena liasü.

August 21 nü osangbener den jembidang Khristan temeden atema inyaker, Minakshi Singh-i, "Kü den külemi inyaker, Sanjay Mcgee küna iba tesem jagi ao aser

yirua alir tetsür asem den tebur ana hospital-i anir ao," ta metetdaksü.

Kasa aonungjisa onoki ken o benokogo, ta lai metetdaksü.

Minakshi Singh ya Uttar Pradesh nung amenoka aliba Khristan charity telok Unity In Compassion nung general secretary lir.

Laisa, "Tesüiba küm 13 tashi Pastor Satpal Bhati-i house church nung tekülem sentong agia arur, ajisiaka timtem kecha majurui liasü," ta metetdaksü.

Police-i CCTV noksa repringo aser parnoki parnok teinyaktsü mapa shidak inyaktsü, ta onoki imlar, ta laisa metetdaksü.

Khristantemi police station nung ken o agütsüba mapang nungji police station kima nisung 400-500 shi adenshir Hindu nung yimyim ayima liasü, ta lai ashi.

"Police station kima longkak aittsü atema lokti dang melara parnoki Delhi nung ano Tenla ki aika amaktsü atema kecha marendaktsü," ta lai ashi.

Osangbenertem den jembidang tenük kuli alir kati, Hindu nung loktiji tekülem ki telung jagi aiba sülen yimyim ayima liasü, ta ashi. Paisa, India linük melenshiogo aser joko secular linük ka masü; ozüngtem melenshiogo, ta ashi.

Bajrang Dal züngsem kati, "Parnoki [Khristantem] nisung kar yimsü meyipdaksütsü meranga liasü. Onoki ibaji memelatsü. Kechiba parnoki Hindu nung nütsüng teimba aliba tesem nung ang sarasademner?" ta ashi.

Osangbener den jembidang pastor Bhati-i, "Tesüiba küm 13 tashi onoki yangi sarasadem sentong agia arur. Khristantem tsüba dang alir," ta ashi.

Asia nung Khristantem reshikangshiba kanga bulua kümogo

August 23, 2023: Asia aser alima tesem ajaklen Khristantem anema inyakba tatalokbatem kanga bulua kümogo, ta osang ka ajanga metetdaksü.

Tawa Pakistan nung Punjab province kübok Tenla kitem rongdoktsüba den külemi Khristantem anema inyakba aser Manipur nung tatalokbatem ya Asia nung Khristantem anema inyakba bulua akümba tatishitsü lir, ta Catholic Peace Broadcasting Corporation of Korea-i report ka ajanga metetdaksü.

Kasa report ajanga Permanent observer of Vatican to United Nations (UN), Fortunatus Nwachuku-i taküm March ita nung UN Human Rights Council senden nung, 'tanü alima nung Khristan tenet shia nungi katibo reshikangshi ajurur' ta sangdongba metetdaksü.

2014 küm Pope Francis-ia, "Mezüngbuba asotem (centuries) den medemdanra tanübo Khrista atema

kulisertem kanga aika kümogo aser tanü Arogo atema taküm bendanga agüja asür aika kümogo," ta metetdakja liasü.

Pakistan aser India na dak alia Asia kübok communist linüktem - China, Vietnam aser Laos nung Khristantem reshikangshir aser Africa nung aliba linüktem nunga kiralongrartemi Khristantem aika tepseter, ta report nung shia lir.

'Laishiba lima' ta tetshiba Israel nunga tawa yimsü alia amanger Yihuda nungertemi Khristan meyong temeshi kiojentem amaker, ta report nung shia lir.

Tsüngrem mezüngmeshiba ozüng kübok tiyazü nung tai tonglokja Khristantem amakba ajanga Khristantem taküm lendong tia nung aliba jenjang sayur, ta report nung shia lir.

India kübok Manipur nunga Tenla kitem aika rongdoktsüba den nisung 190 shi tepsetba ajanga sorkari item ama tatalokba menokdangtetba aser vote atema inyakba sayur, ta

Catholic Peace Broadcasting Corporation of Korea indang report nung shia lir.

Central America kübok Nicaragua nunga Daniel Ortega yimsüsüba kübok Arogo kanga reshikangshir. Ortega yimsüsüba kübok democracy pusemer Khristan lenirtem anema inyaker aser Arogoi lapokba universities indang kiojen soita ayur, ta report nung shia lir.

Tawa Lisbon nung ayongzükba World Youth Day (WYD) nung putir ana adenba sülen linüki meyipa arudang sorkari nokdanga liasü.

China nung communist sorkari Khristantem anema inyakba tesashiba kümogo aser province kar nungbo asentenshir Kangki den Khristan temaitsütem agientsü telemtetba agiogo.

Tawa Israel nunga Khristantem amokmerenba aser Khristantem anema inyakba kanga bulua kümogo. Israel nung Tenla kitem aser Khristan lepertem raksatsür.

ANOGO ABEN TSÜNGREM DEN

Yimjung Yanglur

T. Ken 120: 1- 7

Yisui ashi, " Yimjung yanglurtemi moa" (Matt. 5: 9). Saka iba lima nung alir ajakbo yimjung yanglur masür. Timtem yanglurtema lir. Timtem adokdaksütsü parnok jangrar aser iba mapaji pelaa inyaker. Ken züluri iba ken züluba mapang iba tia nung liasü. " Kü tejashi nung ni Kibuba dang ayimten, aser pai kü dang langzü. O Kibuba, ni yazüyabongba nungi, aser külak-küpbongba temeli nungi, kü nela Kümzükang" (t. 6,7). Yisu alima nung alidang pai kasa o ya jembi. Pa Yimjung Chuba Chir liasü aser meimchir mulungjang aser taküm nung yimjung agütsü asoshi aru, aji saka nüburi Pai sayuba magizük.

Kaini Abel tepsetba mapang nungi tenzüka asenoki alima nung rara aser tetsükchitep angur. Kin kati kin ka anema rarar, kibong nung timtem adoker, adianu tsüngda mangatettep adoker, aser Khristantemia kati ka dang tai adoktsü memelunger. Dawid rara ajanga ao. Yisua rara ajang ao. Aser asenokia ibaji ajanger.

Alima nung yimjung yanglurtem asütsü asoshi Tsüngremi asenok aja. Kechiaser asenok Pa den yimjung nung lir. Mekümzükba pur ama asenok malitsüla. Alima nung ali tashi asenoki raraji ajurulanglang saka asenok mapang, tia ajak nung yimjung yanglur asütsü Tsüngremi mulungba lir.

" Ni yimjung asoshi lir," ta ken züluri ashi. Iba tetezü, " Ni yimjung lir." Nisung shia tongpang raradak mesüra yimjung yangludak dena lir. Rara ayongzük ka mesüra yimjung ayongzük ka na aser ni lir. Kari yimjung adokdaksür aser ka alidak rara adokdaksür. Iba tebenja lima nung asenok yimjung yanglur asütsü Tsüngrem dang Pa taochi meshidi.

Tamangertemji yimjung yanglurtem lir. Tanen maka rara alidak na yimjung yanglur ka asütsü mapang tajung aika angur. Aji saka yimjung mapaji temela masü. Yimjung yanglutsü nai ariteper asü? Tangar asoshi naji temoatsü ayong ka asütsü merangang- yimjung yanglur ka kümang.

Pakistan nung Tsüngrem mezüng-meshiba ozüng kübok Khristan ka apu

Lahore, August 23 (Agencies): Honibar aonung (August 19) Pakistan nung police-i Tsüngrem mezüngmeshiba ozüng kübok Khristan ka puogo.

Taoba hopta Khristan, Ehsaan Shan Masih-i TikTok nung Pakistan kübok Jaranwala nung Tenla kitem aser Khristan kitem rongdoktsüba dak sendakba video ka lemsatapa liasü.

Arrshi küm 27, Ehsaan Shan Masih-i Tik Tok nung video ka lemsatap, aser ibaji ajanga Tsüngrem mezüngmeshiogo, ta tai tonglokja Islam yimsü alia amangba party Tehreek-e-Labbaik Pakistan-i longkak aittsü ayongzükba sülen taoba hopta tatembanglen Pakistan kübok Sahiwal yimdag Khristantem anema apuso.

Sahiwal Baptist Church

nung pastor Abraham Daniel-i, "Mapang shidak nung police tiyongtsü aitba ajanga lendong tulu nokdangteta liasü, yamaji masüka asü nungbo Sahiwal nung Khristantemi lendong tulu ajurur lila," ta metetdaksü.

August 19 nü police-i Ehsaan Shan Masih den par kibong apu aser tang Masih jail nung puoka lir.

Pastor Daniel-i, "Ehsaan ya aayanger ka aser tanur ana tebu. Pai azüng-zülu mashi. Pai social media nung Jaranwala amakba dak sendakba nung video ka TikTok account nung lemsatap. Iba ama noksa lemsatepbaji ozüng alema, ta pai memeteti liasü. Pa tekaraba nung chioktsü atema onoki sarasademtsür, iba denji külemi ni Khristantem dang social media kanga kümdanga amshitsü mepishir," ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Rüklok

(v)teka agi tzü mesüra azü jashia oa enoktsüba (sprinkle)

* Limapurtemi shiruru zü **rüklokja** ali tsüngrem külemer.

Rükten

(v) tokolak arakzükba agi masüa ta ashiba (shaking head in disagreement)

* Lokti nung nisung karbo tokolak **rüktena** dang amener.

OLONG PAITEP # 6615

1					2				3
							4		
5		6			7				
8									9
							10		
				11	12				
		13							
14					15				
				16					

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6614 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer, 13. Sen,
- 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsütsü, 6. Azübenshi, 8. Lah,
- 9. Jangkok, 12. Akok, 14. Nashi, 16. Sür.



SADI BENJONG KA NUNG PASTORBAI
CHIYUNGTSÜ MESHITETA
SARASADEMER :

Pastor :Tamasa ni ola adoka sarasadem masüdang asenok ajaki mokremer, iba benjong nung AK terpungu, an neter, nashi ana, napong ana laodaktsüogo, item taküm shiruru tepsetba atema Tsüngrem dang tatok meshia minute ana silent prayer agidi no.

~ Lilir : WhatsApp

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Mizoram nung apu ka chirepdang nisung 26 asü



Aizawl, August 23, 2023

(Agencies): Mizoram nung apu chirepba lendong nisung 26 asü. Iba lendong nung tasür ajak ya Sairang nung railway bridge yangludak inyakertem dang liasü.

Tasür teimbaka West Bengal kübok Malda district nungi liasü aser lendong nungsa nisung ana yirua lir.

West Bengal sorkari Mizoram keddangsurtem den osang metetpeladar.

"Mizoram nung under-construction railway apu ka chirepba osang angashia aoksar.

Iba lendong nung mapa inyaker aika süogo aser tasürtem rongnung ozü Malda district nung

alirtem dena lir" ta West Bengal CM Mamata Banerjee-i ashi.

"Ni ozü chief secretary dang Mizoram administration den rescue/assistance operations atema yariteptsü shiogo" ta Mamata-isa ashi.

"Malda district administration-i tasür kibongtem den osang agitepogo aser akokba teyari agütsütsü" ta laisa ashi.

"Onoki tasür kibong shia nem teyari shitak agütsütsü. Asür kibongtem den mangyim lemsateper" ta CM Mamata-isa ashi.

Prime Minister Narendra Modi-ia Mizoram lendong nung tasür kibong shia nem PMNRF

nungi Rs 2 lakh agütsütsü osang metetdaktsüogo.

Maneni, iba lendong nung yirur shia nem Rs 50,000 agütsütsü ta PM Modi-isa ashi.

Bodbarneep 10:00 ako meta Bairabi nungi Sairang den sendaktepba under-construction railway bridge chirep.

Iba lendong atalokba sülen Young Mizo Association volunteers aser Mizoram police ajanga search & rescue operations tenzüka liasü.

Mizoram nung bridge number 196 indang pier P-4 ji 104 meters talang lir aser iba ya New Delhi nung aliba Qutub Minar dang nungi 42 meters agi talangba lir.

Iba apu yangluba sülen Mizoram-i linük rail network den sendakteptsü.

Külen, Railway Minister Ashwini Vaishnav-ia iba lendong nung tasür kibong shia nem Rs 10 lakh teyari agütsütsü metetdaktsüogo.

Minister Vaishnav-isa lendong nung yirur shia nem Rs 2 lakh teyari agütsütsü ashi.

Sorkar keddangsur kati süpokrem meshidang apu

Guwahati, August 23, 2023

(Agencies): Assam nung Directorate of Vigilance & Anti-Corruption keddangsurtemi August 23 nü sorkar keddangsur kati süpokrem agidang apu.

Iba keddangsur yagi Sand Mahal kibur ka nem meinprong magütsütsü atema süpokrem meshi.

"Tanü DIR VAC, Assam ajanga Sapatgram, Dhubri

Forest Division nung Range Officer, Bablu Dey, AFS apu. Pai süpokrem sen meshidang apu" ta Directorate of Vigilance & Anti-Corruption Assam-i metetdaktsü.

Taküm May 18 nunga Directorate of Vigilance & Anti-Corruption Assam-isa sorkar keddangsur anati ochimashi inyakba puteta liasü.

Nübertemi government

departments nungi services meshiba atema süpokrem meshia agiba atema tena apu.

Vigilance & Anti-Corruption keddangsurtemi Commissioner, State GST, Assam nung Assistant Commissioner of State Tax Minakshi Kakati Kalita apu.

Lai GST online functions tenzütsütsü atema Rs. 10,000 süpokrem meshi aser ibaji Rs. 8,000 tashi ajem.

GOVERNMENT OF NAGALAND
OFFICE OF THE SENIOR TREASURY OFFICER
KOHIMA SOUTH TREASURY

NO:KTS/PEN/106/2005-06/

Dated Kma the 22nd Aug. 2023

PRESS RELEASE

This is to inform all Pensioners both Life and Family drawing pension fror Kohima South Treasury, that the Annual Physical Verification for 2023-2024 wi be held from 11th September to 16th September 2023 at the new South Treasur Office (ie DC Office compound) during office hours. All the Pensioners are to appear physically along with PPO Book, Renewed NPA ID card, Life Certificat and Non-Marriage Certificate which is being issued from the Treasury Office Failing which payment will be stopped.

Sd/-

(ZUBENTHUNG MURRY)
Treasury Officer
Kohima South Treasury

GOVERNMENT OF NAGALAND
STATE COUNCIL OF EDUCATIONAL RESEARCH AND TRAINING
NAGALAND : KOHIMA

SCERT/TET/GEN.COR-2/2022-23/

// Dated Kohima the 22ndAug.2023.

ADVERTISEMENT
(CORRIGENDUM)

3rd (Third) NAGALAND TEACHER ELIGIBILITY TEST (N-TET) - 2023

In continuation of the advertisement vide no. SCERT/TET/GEN.COR-2/2022-23/Dated Kohima the 17thAug.2023, this is to inform all the aspiring candidates that the requisite qualification for appearing N-TET for both Primary and Upper Primary Level isrevised as follows:

Eligibility Criteria:

(i) **Minimum Educational Qualifications for becoming a Teacher for Classes I to V**

Primary Level, Paper - I

Passed Senior Secondary / 10 +2 with any of the following professional qualification (i.e.,B.Ed/ D.Ed/B.El.Ed/D.El.Ed)

(ii) **Minimum Educational Qualifications for becoming a Teacher for Classes VI to VIII Upper Primary Level, Paper - II**

Passed Graduation with any of the following professional qualification (i.e.,B.Ed/D.Ed/B.El.Ed/ D.El.Ed)

All other information given earlier remains unchanged.

(KEVIRALE-Ü KERHUO)
Director
SCERT, Nagaland Kohima.

China Tir Xi Jinping-i BRICS tuluba akümtsü ayongzük

Johannesburg, Luroi/ August 23 (Agencies): Alima tensa tajungba azüoktsü mechi China Tir Xi Jinping-i BRICS ulushitsü ayongzük aser China indang DNA nung "hegemonism" (tashi taitba linüki tashi tila linüktem amokbangba) mali ta nenshia ashi.

Mongulbar nung Johannesburg, South Africa nung BRICS summit tenzükba mapang pa tenüng nung China ketdangsur kati zünga ashiba nung, China-i tashi uluba tokteptsü tejangraba mali mesüra "bloc confrontation" adoktsü jangra mali, ta Xi-i ashi.

"China ya puti otsü shidakba nung nokdaka lir aser ajak ajungtsü asoshi inyaktü tangatetba nung lir," ta Xi-i business forum nung ashi, koba Commerce Minister Wang Wentao-i zünga ashi.

Tenokdangba liaka BRICS maneni aintsüla, ta pai ashi. "Tang asen mapang alima melenshir, aser tesüiba mapang majangshiba ama otsütem adoker aser meimchir tongtipang lemjem ka nung lir," ta Xi-i ashi.

South African Tir Cyril

Ramaphosa, Brazilian Tir Luiz Inacio Lula da Silva aser India Ato Kilonser Narendra Modi nung Xi kechiba shilem magiar mejangja.

Iba sentong metenzükdang Xi-i iba senden ayonger Ramaphosa ajurua liasü aser "new historical starting point" nung parnok linüktem lir ta shia liasü.

China aser Russia linük anaprong nem United States-i tenokdangba/temerenshi balala agüja lir aser alima nung yimtenren aser inyaksangshi balala nung anüolen linük temi amokbanga aliba den tokteptsü asoshi BRICS ya tuluba kumdaktsütsü linük anaprong tejangraba lir.

Saudi Arabia, Indonesia, Iran, Argentina aser Egypt linük temi iba bloc nung adentsü tejangraba lemsatepogo - tang Brazil, Russia, India, China aser South Africa lir - koba alima nütsüng yongsük shilem 40 shi aser alima rongsenketzüng shilem 25 dang tali lir.

Ajisüaka iba telok ya ulushitsü indang onük nung telemsa adoka lir, kong Brazil aser India nati iba bloc ulushitsü

kangabo molunga mali.

Bloc atema mangdang balala aliba temaitsü ka ama Brazil Tir Lula-i ashiba agi, BRICS yagi G7, G20 mesüra United States den tokteper ka ama akümtsü memeranger.

"Onoki onok telungjem dang liner," ta Lula-i social media broadcast ka nung ashi.

Züngsem ulushiba dang masü iba senden nung ano US dollar dak metaloka aliba ajemtsü asoshi shishilempaba aser senotsü tsütatepba nung local currencies amshitsü asoshi lenmang bushitsü atema jembitsü lir.


Iba senden nung Russia Tir Vladimir Putin madener, saka pai sangdong ka jelia record süa aliba nung ashiba agi, dollar amshiba nungi bloc pila aoba melenshitsü makok aser terenlok tajung lir.

Moscow-i Ukraine amakba mechi Western sanction balala agütsüba ajanga Russia indang rongsenketzüng kanga mejungi raksar lir.

War crimes mechi international arrest warrant kübok alisang Putin melen iba BRICS senden nung Russian Foreign Minister Sergey Lavrov adener.

OFFICE OF THE LONGJANG SENSO MUNG DANG

TENÜNGSANG AGÜTSÜR



(Nungshi Aier)



(Among Jamir)

Pei-pei wadang nung takok anguba aser yimer dangi konang nüngsang bener arutsüba asoshi Longjang Senso Mungdang ajanga item nisungtem nem tenüngsang tetushi agütsür:

1. **Shri NUNGSHI AIER**, VDB Secretary Longjang village, pai dangar dak alia bendanga agütsür VDB Secretary, Longjang ama meranga inyakba asoshi August 15, 2023 nü Gold Category award angu.
2. **Shri AMONG JAMIR**, S/o Late N. Imti Jamir, music nung kanga ajungba yong Governor's Award 2023 angu.

Tulusang Tsüngremi nenok tarutsü wadang moaja len aniang ta Senso Mungdang-i sarasademtsür.

Sd/-
M. Temjen Jamir
President LSM

Sd/-
T. Imti Pongen
Secretary LSM

Thaksin Shinawatra tepuokdak nungi mozü kidangi anir ao

Bangkok, Luroi/August 23 (Agencies): Thailand indang taoba ato kilonser Thaksin Shinawatra küm 15 shi bendang lima nung jenoka lir linüki meyipa shilangli ochimashi maparen balala mechi tepuokdak yasüng ayu saka mozüki kati anir ao.

Corrections Department ajanga sangdong ka nung ashiba agi, arishi küm 74 tain Thaksin ya blood pressure aser blood oxygen level ajema aliba mechi Bodhbarnep Bangkok nung aliba police hospital kati anir ao.

"Pai tashidak kar anepalutsü nüngdaker ta ashi - talisa temolungjang tashidak, aser tepuokdak aliba mozüki nung hadir shidak maka," ta Corrections Department indang odongtar Sitthi Sutivong-i sangdong nung ashi.

"Pa takum lendongi meyoktsü mechi pa Police hospital-i yoktsüla ta doctor-

i ashi,"

Thaksin ya billionaire ka lir aser pa ato kilonser inyaka aliba mapang 2006 küm mitkar temi tashiyim amshia atsüngdoka liasü, aser Mongulbarne nija tayimtsü ka nung Bangkok tonga aru, aser iba mapang par Pheu Thai party ya mitkar den sendaktepa aliba densema political party balala den lungjemer sorkar tasen ka kumtetsü renema liasü.

Ato kilonser inyaktü asoshi party-i shimba Srettha Thavisin ya Mongulbar nikonngdang parliament nung shim aser Bodhbarnü linük chuba-i molunga agizükogo.

Thaksin kidangi meyipa shilanger mapang tatsüka tsüngta Supreme Court ajanga tim masüba nung tashi amshiba aser 'conflicts of interest' ken o nung aija küm ti tepuokdak ayutsü obendang agütsü.

Srettha linük tir akumba ajanga bendanglen küm aika jenoka liaka nübu tejangja Thaksin yagi mitkar aser yimtenren nung pa tsükchirtem den tezüngzüktep kar yanglua tepuokdak nungi tekeraba chioktsü südi ta aikati jembir.

Thaksin aser Pheu Thai ajanga tezüngzüktep kecha agia mali ta ashir. Thaksin ya tain kumogo, anungji chuba-i tatok agüja tajungba anepalutsü akok, ta taoba sorkar nung minister kati shia liasü.

Pheu Thai-i aniba coalition tasenbai progressive Move Forward Party (MFP) mangdang raksatsü, shirnoki election nung menden timba ngua liasü.

Iba party lenir Pita Limjaroenrat ya ato kilonser akümtsü merangba nokdang, kechiaser pai mitkar temi shimba upper house teyaria nüngdaka liasü.

Turkey-i Iraq nem PKK ya kiralongrar telok ka ama agizükdaksüner

Ankara, Luroi/August 23 (Agencies): Turkey-i Kurdistan Workers' Party, mesüra PKK ya Ankara aser anüolen aliba linüktemi agizükba ama kiralongrar telok ka ama Iraq-i agizükdaksü imlar, ta Turkey foreign minister-i ashi.

Turkey nung ketdangsur Hakan Fidan-i office mapa agizükba sülen tang mezüngbuba Mongolbarnü Baghdad semdangogo.

Fidan-i Baghdad semdangba ya Turkey tir Recep Tayyip Erdogan-i Iraq semdangtsü aliba

asoshi renemshitsü atema lir. Pai ashiba agi PKK ya arok tsükchir lir. Turkey tir Recep-i Iraq semdangtsüba anogo tejangja tang tashi sangdonga mali.

"Onoki Iraq indang sovereignty amokmerenba PKK agizüktsü makok," ta pai Iraq foreign minister Fuad Hussein den Iraq yimtiba nung külemi osangbenertem den sensaksema mapang ashi.

"Sinjar, Makhmour, Qandil, Sulaimaniyah aser tanaga Iraq kübok district aika PKK kiralongrar telok yagi

amokbanger lir," ta paisa ashi.

Ankara-i, parnoki Iraq kübok tesem balala atsünger aliba telok atsüngtoktsü meranger ta shiaka Turkey-i Iraq anütoktiplen tayimtsü amshia tesem balala amakba ya Iraq sovereignty anema lir ta Baghdad-i ashishia arudar.

Bodhbarnü Turkish intelligence-i sangdong ka ajanga Sulaimaniyah nung PKK züngsem ka khasetogo, shiba security force tem tepsettsü atema Turkey nung training agia liasü.

(Maneni tapak 8 nung...)

Mulungnen O



ASOBA : 12.04.2007 - ASUBA : 15.08.2023

Onoki teti meima aliba jabaso Yangerlong Lemtur, Longmisa. 15th August 2023, anogo nung lendong tulu ajurua iba lima toktsür teti tepeladak limai ogo.

Iba lendong mapang onok shisabula aser mulungzereb tia nung alidang, ana aser talang nungi shirnokisa nubu, rongsen, shisatsü aser Sarasadem nung yaritepogo, nenok ajak dang, jabaso Yangerlong tenüng nung kangasa pelaba Mulungnen O lemsateper.

Nenok mapa tajung asoshi tanu onoki kecha meyipba magütsütetter, saka tulusang Tsüngremi nenok temeim mapa asoshi tali moajangma.

Mr. & Mrs. Imsumeren & family Longmisa
Süngkomen Ward Mokokchung.

Office of the AOLI LONGCHAR KIDONG

H.Q: Mokokchung, Nagaland.

AOLI LONGCHAR MEETING JAZÜKER

Aoli Longchar Kidong mendenti ajanga züngsem ajak dangi salem abener. Media nung adokba ajaki ngua alitsü, Tir Yimyim adok (VOL. XX NO.309 (ADOK 309) LUROI (AUGUST) 21, 2023). Ao Milen adok (VOLUME)-III ADOK. (NO)-2359, LUROI (AUGUST) 21, 2023.) Longpok Semchir Telungjem Tatar Salang-i par tebou tenüng rakzükter aotsü meranger ta item Paper nung angutsü.

Anungji iba Ken O bentettsü ajak mulung nung shisadanger Süngpu zünga nungi Puti tashi arua adentsü mendenti ajanga jazüker.

Tesentepdak : Kimen, Nungsanglemba, (Salangtem Ward Mkg)
Anogo : 30/08/2023
Mapang : 10:00 AM

Külem tenzükter,

Sd/-
Dr. Imkongwapang
Tir
8974302644

(Aren Longchar)
Tezülur
7085198354

Sports Minister Anurag-i Rajasthan nung Khelo India Centre 33 lapoktsüogo



New Delhi, Luroi/August 23 (Agencies): Union Minister of Youth Affairs and Sports, Anurag Singh Thakur-i Bodhbarnü Sawai Mansingh Stadium nung Rajasthan nung Khelo India Centre 33 lapoktsüogo.

Paisa, Rajasthan nung sports science centre ka densema National Center of Excellence ka aser Khelo India centre 18 amenoktsütsü aser iba ajanga state nung Khelo India centre ajak senteper 51 akümtsü ta metetdaksü.

KIC tem lapokba sentong nung Ashok Chandna, Minister of Youth Affairs and Sports, Govt. Of Rajasthan aser state YAS Ministry aser Sports Authority of India nungi ketdangsürtemi shilem agia liasü.

"Saisapong dak sendakba

nung onoki state ajak renloka odaktsüner. Saisapong atema nükla tajung yur kodang state aser Centre sorkar na longjemer inyakdir idangji India atema asayartemi medal timba bener arutsütsü. Taoba küm ishika tsüingda Olympics mesüra Paralympics mesüra Commonwealth games mesüra otsüsüsüsisa Thomas Cup akokba densema international jenjang nung asayartemi medal aika nguogo aser iba ya Khelo India scheme aser Target Olympic Podium scheme takok ngua aoba kuli lir," ta Thakur-i ashi.

Tang KIC tem nung asayar 17,000 dak tema nem training agütsüdar aser taoba mapang takok tajung anguba asayar 699 tem anisemer inyaksangshidar. Tang tashi nung Khelo India Centres 960 amenoka lir aser item

rongnung 715 bo inyaksangshi tenzükogo.

Rajasthan nung amenoka aaliba KIC 33 nungi 32 bo inyaksangshi tenzükogo. Item KIC tem nung cycling, basketball, wushu, hockey aser tanga asayatem dak sendakba nung training agütsüdar.

Khelo India koda tongtibang iba indang jembiba mapang minister-i, "item takok ajak asoshi Khelo India games-i tongtibang shilem ka agiogo. Kümshia sempet tajung aketba asayartem Youth, University aser Winter Games nung shilem agir. Item Khelo India Centre tem ajanga Rajasthan nungi asayartem aika anitetsü imlar. Taoba mapang tang aser tarutsü asayartem nem item centre tem ajanga maongka tajung agütsür," ta ashi.

Turkey-i Iraq nem PKK ya kiralongrar...

(Tapak 7 nungi...)

Taboba intelligence tekolakba Fidan-i, Kurdish ketdangsürtem den sensak asemtsü atema Iraq anütoktip semdangtsü.

PKK ya European Union aser United States aser Turkey-i kiralongrar telok ka ta agizükogo. Iba telok yagi 1984 southeast Turkey nung prangbong hadir balala bener apuso aser tang tashi nung nisung 40,000 dak tema tepsetogo.

Turkey-isa, People's Protection Units (YPG) dak rangloker inyaksangshia arudar, shirnok Syria nung PKK indang kongsang ka lir.

Iraq foreign minister-i Mongolbarnü, PKK koma azüoktsü iba dak sendakba nung Baghdad indang sentong indang indang melemsatop, saka iba ken o ya tawa kanga tongtibang kümogo, kechiyong Iraq anütok tiplen aser Syria nung Kurdish sepaitem aser Turkey na kanga sashia

raratepa arudar.

Kasa mapang nung Erdogan-i Iraq semdangba mapang iba ken o ya kanga tongtibangsüa jembitsü imlar. Erdogan-isa, Turkey dangi totzü yokba, koba Iraq kübok semi-autonomous Kurdish region atema küm aika kanga tongtibang onük ka lir, iba indang sensaksemtsü imlar.

Baghdad nung federal sorkar ketdangsürtem aser Erbil nung amenoka aliba Kurdish regional sorkar ketdangsürtem tsüingda totzü revenue lemsatopba dak sendakba nung mapang talangka mangatetep adoka arudar.

Parnok indang autonomy jenjang ajungketshitsü atema Kurdish region-i 2014 küm independent revenue stream ka atokdaksütsü atema Turkey kübok Ceyhan tesemi totzü yoktsü telemtetba agia liasü.

Iba sentong ya taküm March ita raksaogo, kechiyong

paris nung International Chamber of Commerce-i, Ankara-i Baghdad den taoba mapang tenangzüktepba ka yanglur aliba raksaogo, ta ashi. Iba tenangzüktepba ajanga Iraq federal sorkar kija nem pipeline ajanga Turkey dang Iraq indang totzü ayoktsü temelaba agütsür lir.

Iba dak sendakba nung Ankara-i parnok indang litsü nung pipeline ajak shibangtsü, koba Kurdish sorkari totzü pump asütsü amshia liasü.

Kurdish sorkar ketdangsürtemi tenangzüktepba tasen ka yanglushitsü atema Ato Kilonser Mohammed Shia al-Sudani den sensaksema arudar, ajisüaka tang tashi nung ken o kecha tembanga jembishinüa mali.

Iraq aser Turkey foreign minister tem Baghdad nung ajurutepba mapang oil minister-i anir Iraq nung ketdangsürtem telok kati Turkey semdanga liasü.

U-15 tetsürtem atema open trials ayonger

Dimapur, Luroi/August 23 (TYO): Nagaland Cricket Association-i, U-15 tetsürtem atema Open Trials ka asoshi asayartem jaokogo. Iba trails ya August 26 nü 9:00 ako nungi tenzüka Nagaland Cricket Stadium, Sovima nung agitsü.

Iba trail nung shilem agitsü atema asayar kaji Nagaland nung alir ka asütsüla. Asayar ya 01-09-2008 aser 01-09-2010 tsüingda asor asütsüla.

Kasa mapang nung

asayartemi trails nung shilem agitsü aruba mapang original Birth certificate, Aadhar Card aser School Marksheets bener arutsü nungdaker.

Trails nung shilem agitsü janrartem August 26 nü ground 8:30 ako nungbo tonger alitsüla.

Iba dak sendakba nung osang tejangjaba agitsü atema item number: 8730077706/9366927597 nung

tongteprateptsü asoshi NCA-i metetdaksüogo.

ODI batting rankings nung Gill 4bubai tuogo

Dubai, Luroi/August 23 (Agencies): Bodhbarnü sayaba ICC ODI rankings nung India nung asayar Shubman Gill jenjang ka tejakdangi tua tang pezübuba nung lir.

India nung rongnungisa ODI bowling ranking nung pacer Jasprit Bumrah aser spinner Ravi Bishnoi nata tejakdangi tuogo.

Pakistan aser Afghanistan na tsüingda mezüingbuba ODI asayaba sülen sayaba ODI rankings nung Gill-i rating point 743 ngua lir aser pa India nung batter tem rongnungi ajak dang temaba jenjang nung lir.

Kasa mapang nung Bumrah shiba yiruba ajanga mapang talangka masayai lir Ireland den asayaba mapang India team pa lenisüba nung asaya arudar, pa jenjang tenet tejakdangi tua tang 8buba nung lir aser Bishnoi

jenjang 17 tejakdangi tua tang 65buba nung lir.

Ireland den tanabuba T20I asaya nung run 58 yangluba sülen Ruturaj Gaikwad-a jenjang 143 tejakdangi tua tang 87buba nung lir.

Ireland den asayamung nung masayatetaka Suryakumar Yadav maneni T20I nung asayar ajak dang temaba jenjang nung lir.

ODI nung Pakistan nung asayar Babar Azam aser Imam Ul Haq na mezüingbuba aser tasembuba jenjang nung lir aser India nung asayartem rongnung Virat Kohli (9buba) aser captain Rohit Sharma (11buba) na jenjang masetshi lir.

Test asaya nung India nung spiner Ravichandran Ashwin aser all-rounder team ronung Ravindra Jadeja temaba jenjang nung lir.

NZ coaching team nung Stephen Fleming denogo

Luroi/August 23, 2023 (Agencies): India nung ODI World Cup masaya tsüingda New Zealand-i taoba captain Stephen Fleming aser taoba mapang England nung asayar Ian Bell aser James Foster nung coaching staff ama anisemogo.

Fleming aser taoba mapang wicketkeeper Foster naprongla nung IPL nung coach ama inyaka arudar aser iba ajanga World Cup nung team nem teyari agütsütsü imlar, koba October 5 nungi tenzüktsü.

Fleming ya küm ter dak tema Chennai Super Kings indang coach lir aser pa tawabangba kübok MS Dhoni-i aniba team yagi IPL ponguben kokogo. Pa taruba ita The Hundred nung Southern Brave men den pa mapa tembangba sülen England den ODI asayamung atema NZ team nung adentsü.

"Flem ya asayartem aser staff tem atema kanga tajung asütsü ta amanger," ta New Zealand head coach Gary Stead-i ashi.

"India nung asayaba dak sendakba nung pai shisatsü

aika bena lir aser pa IPL tetenzük nungi coach mapa inyaka aruogo, anungji onok asayatsü aliba tesem ajak nung pai coach mapa inyakogo," ta pasia ashi.

Kasa mapang nung Foster ya Kolkata Knight Riders indang assistant coach lir. Taoba mapang wicketkeeper ya alima ajunga nung T20 league balala nung coach mapa inyaka aruogo.

Pa taruba ita England den ODI atema team nung adentsü aser iba sülen World Cup atema maneni team nung adentsü.

Maneni taoba mapang England nung asayar Bell, iba ita tatemlen nungi tenzüka England den T20I asayaba mapang assistant coach ama team nung adentsü.

Pai asaya pezü asayatsü aliba ODI asayamung nung batting coach ama Luke Ronchi melen inyaksü aser taruba ita Bangladesh den ODI asayaba mapang kasa mapa abentsü. Iba mapang Ronchi-i head coach Stead melena inyaka atatsü, shiba World Cup matong tsüingda mapang tatsüka atema break agitsü.

BILEMDANGANG

"Temeim agi tetsükdaksü ajak kokteter."